



## Kugluggsi

E Wältusstellig hämmer gha  
Der Miescher, dä sucht Ruchm,  
Doch 's Defizit schtoht hindedra,  
Em Publikum isch's z'dumm.

Nur d'Tanzschiffgirls hänn profitiert  
Ihr Wasserkraftnutzung, die lauft wie  
[gshmirt.

Und Baselstadt und Baselland  
Sott-me wieder zämme-fuege,  
Der Edwin saits und d'Nazi pfyfts  
Und d'Rammel „Wai scho luege“.

Vo Scheenebuech bis Ammel stingt  
Das Gschnerr zuem Himmel, das doch nyt ybringt.

E Heldegsellschaft mueß scho sy  
Im Rothusposchte unde  
Wenn aine nießt, so tien si gly,  
Kryzwys in d'Hose pfunde,

Und haue's los im schlangge Trab,  
Schieße im seggle sich no' d'Finger ab.

E Volksfescht het-me projiziert  
Am erschte Augscht am Rhy,  
D'Lyt sin in Masse uffmarschiert  
Und hänn sich druggt wie's Vich.

Und s'Fyrwärgg hett-me erscht azunde  
Am zwaite Augschte halber z'Hynige unde.

Wär het nit vo däm Sens unique  
Fir d'Kinderwäge gheert,  
Die Bonze in der Gsetzfabrigg  
Die sin doch myseel gschteert.

Dr Sens unique bim Kinderwage  
Brucht gwis kai Gsetz, dä lauft vo sälber abe.

Daß Dummi immer grupft mien wärde  
Verschtehn d'Zygyner au,  
Si kemme-n-is ko d'Gutti herte,  
S'Verfahre, das isch schlaue.

E mängege dänggt, s'isch dumm bigoscht  
Sunscht hett dr Seebel z'herte nit vyl koscht.

Was'me efangs fir Sache baut,  
Me kriegt bald der Verleider,  
S'scheen Stadtbild wird no ganz versaut  
Vo däne Stadt-Verkaiber.

E Silo wird die Kirche blybe  
Dert inne ka me schwarzi Seele byge.